



RESOLUCIÓN DA SECRETARÍA XERAL DE POLÍTICA LINGÜÍSTICA DA CONSELLERÍA DE CULTURA E TURISMO E DA DIRECCIÓN XERAL DE EDUCACIÓN, FORMACIÓN PROFESIONAL E INNOVACIÓN EDUCATIVA DA CONSELLERÍA DE EDUCACIÓN, UNIVERSIDADE E FORMACIÓN PROFESIONAL POLA QUE SE APROBAN AS BASES E SE CONVOCAN OS PREMIOS A CURTAS DE ANIMACIÓN EN GALEGO ELABORADAS NO MARCO DO PROGRAMA NÓS TAMÉN CREAMOS! PARA O CURSO ACADÉMICO 2018/2019

O Estatuto de autonomía de Galicia recolle a obriga dos poderes públicos de garantir o uso normal do galego e de potenciar o seu emprego en todos os planos da vida pública, cultural e informativa, así como de dispor os medios necesarios para facilitar o seu coñecemento.

Así mesmo, a Lei 3/1983, do 15 de xuño, de normalización lingüística establece que as autoridades educativas da Comunidade Autónoma arbitrarán as medidas encamiñadas a promover o uso progresivo do galego no ensino e que a Xunta de Galicia debe estimular as manifestacións culturais en lingua galega e contribuír ao fomento do libro en galego.

Por estes motivos, o Decreto 79/2010 para o plurilingüismo no ensino non universitario de Galicia sinala a necesidade de aumentar o emprego do galego nas actividades complementarias e a Administración educativa procura fomentar o seu uso en distintos espazos e situacións de comunicación dos centros educativos, sobre todo a través da acción dos equipos de dinamización da lingua galega (EDLG).

Ademais, a Lei orgánica 8/2013, do 9 de decembro, para a mellora da calidade educativa contempla o logro da competencia nas dúas linguas oficiais das comunidades autónomas con idioma propio como unha das finalidades da educación, xunto coa adquisición de coñecementos técnicos e artísticos que aseguren o pleno desenvolvemento da personalidade e das capacidades do alumnado.

Ao mesmo tempo, a comunidade educativa é consciente de que as aprendizaxes lingüísticas se fan tamén fóra das aulas de lingua e da importancia que ten, para a adquisición do galego, tanto a lectura neste idioma como a motivación para usalo. Neste sentido, cómpre favorecer unha asociación positiva do alumnado coa lingua galega mediante a súa ligazón con actividades relacionadas coa cultura actual (audiovisual, TIC...), e tamén por medio da vinculación afectiva que dá o uso do idioma no tempo de lecer.





En consecuencia, a Secretaría Xeral de Política Lingüística da Consellería de Cultura e Turismo e a Dirección Xeral de Educación, Formación Profesional e Innovación Educativa da Consellería de Educación, Universidade e Formación Profesional

RESOLVEN:

Convocar os premios a curtas de animación en galego no marco do programa *Nós tamén creamos!* para o curso académico 2018/2019, de acordo coas seguintes bases:

Artigo 1. *Obxecto da convocatoria*

O obxecto desta disposición é convocar tres premios a curtas de animación en galego elaboradas seguindo as pautas do programa de dinamización lingüística *Nós tamén creamos!* e regular o procedemento para a súa concesión.

Nós tamén creamos! é un programa conxunto da Secretaría Xeral de Política Lingüística da Consellería de Cultura e Turismo e da Dirección Xeral de Educación, Formación Profesional e Innovación Educativa da Consellería de Educación, Universidade e Formación Profesional, en colaboración coa Corporación Radio e Televisión de Galicia (CRTVG). Os seus obxectivos son promover unha imaxe positiva e actual da lingua galega, favorecer o seu uso e aprendizaxe en novos ámbitos e formatos e dar a coñecer as opcións de ocio en galego que lles ofrece aos cativos e cativas a sección infantil do *web* da CRTVG.

Artigo 2. *Características dos premios: categorías, dotación e recoñecemento*

Establécense tres categorías para as que se convoca cadanseu premio:

- Categoría 1: destinada a curtas realizadas con alumnado do segundo ciclo de educación infantil
- Categoría 2: destinada a curtas realizadas con alumnado de primeiro e segundo de educación primaria
- Categoría 3: destinada a curtas realizadas con alumnado de terceiro e cuarto de educación primaria

Cada centro premiado nunha destas categorías recibirá un lote de libros de OQOeditora e mais un agasallo da CRTVG, así como un diploma acreditativo.





O profesorado participante nas curtas premiadas recibirá da Consellería de Educación, Universidade e Formación Profesional unha certificación de Primeiro Premio de Innovación Educativa para cada unha das categorías, cunha equivalencia de 30 horas de formación permanente do profesorado para a persoa coordinadora e de 20 horas para o profesorado participante.

As curtametraxes gañadoras serán emitidas e difundidas, sempre que tecnicamente sexa posible, en distintos programas da CRTVG.

Artigo 3. *Destinatarios*

Participarán nesta convocatoria os centros de titularidade pública admitidos no programa *Nós tamén creamos!*, dentro do Plan Proxecta 2018-2019, convocado pola Resolución do 26 de setembro de 2018, da Dirección Xeral de Educación, Formación Profesional e Innovación Educativa, pola que se regula o Plan Proxecta e se establecen as bases para a participación dos centros docentes sostidos con fondos públicos dependentes da Consellería de Cultura, Educación e Ordenación Universitaria durante o curso escolar 2018/2019.

Tamén poderán participar outros centros educativos de titularidade pública que impartan ensinanzas de segundo ciclo de educación infantil e de primeiro a cuarto cursos de primaria e que soliciten a súa inscrición.

Só se poderá presentar unha solicitude por centro, cun límite máximo de 8 docentes participantes. Os centros poderán presentar un máximo de dous equipos, de 2 a 4 docentes cada un. Polo menos un docente de cada proxecto deberá pertencer ao equipo de dinamización da lingua galega e o resto impartiralle docencia ao alumnado co que se realice a curta de animación.

O alumnado participante deberá pertencer a algún dos cursos correspondentes á categoría pola que participa. En caso de poder incluírse en varias categorías, competirá na categoría do estudiantado de máis idade do grupo.

Artigo 4. *Solicitude de participación*

O profesorado dos centros de titularidade pública admitido no programa *Nós tamén creamos!* do Plan Proxecta 2018/2019 quedará inscrito de oficio no concurso, de maneira que non necesitará presentar unha solicitude de participación.

O resto do profesorado deberá solicitar a súa participación mediante unha instancia (ver anexo), que presentará no Rexistro Auxiliar da Secretaría Xeral de Política Lingüística, no Rexistro Xeral da Xunta de Galicia ou nos lugares e na forma previstos no artigo 16.4 da Lei 39/2015, do 1 de outubro, do procedemento





administrativo común das administracións públicas. Se a solicitude é remitida por correo, presentaraa nun sobre aberto para que o persoal de correos poida selala e facer constar a data antes de certificala.

O prazo para solicitar a participación comezará o día seguinte ao da publicación desta convocatoria no *web* da Secretaría Xeral de Política Lingüística (www.lingua.gal) e no Portal Educativo da Consellería de Educación, Universidade e Formación Profesional (<http://www.edu.xunta.gal/portal/>) e rematará o 12 de xaneiro de 2018.

Unha vez rematado o prazo de inscrición, a Secretaría Xeral de Política Lingüística e a Dirección Xeral de Educación, Formación Profesional e Innovación Educativa publicarán a relación de centros admitidos e excluídos no *web* da Secretaría Xeral de Política Lingüística (www.lingua.gal) e no Portal Educativo da Consellería de Educación, Universidade e Formación Profesional e comunicaranlles aos centros a aceptación da súa participación por correo electrónico.

Artigo 5. *Material e asesoramento*

Enviaráselles aos centros que, por non estaren inscritos no Plan Proxecta, aínda non recibisen o material, un lote de libros cuxos dereitos de autor lles foron cedidos á Consellería de Cultura e Turismo e á Consellería de Educación, Universidade e Formación Profesional para este proxecto. Os equipos participantes deberán escoller un destes libros para basearen nel a curta que realicen co alumnado.

Durante o proceso de creación, os centros que non están inscritos no Plan Proxecta tamén contarán con asesoramento técnico no enderezo electrónico nostamencreamos@gmail.com e recibirán formación adaptada á temática na que se encadra a convocatoria, en relación coas competencias audiovisuais, tecnolóxicas, dixitais e lingüísticas e coas materias precisas (lingua, guión, iluminación, son) para elaborar unha curta en galego coa técnica *stop motion*.

Artigo 6. *Características das curtametraxes*

As curtametraxes de animación que se presenten ao concurso serán unha adaptación cinematográfica en animación e coa técnica *stop motion* dalgunha das obras literarias facilitadas aos centros participantes e cuxos dereitos de autor de carácter patrimonial se lles ceden á Consellería de Cultura e Turismo e á Consellería de Educación, Universidade e Formación Profesional para a reelaboración obxecto deste concurso. As músicas e os efectos sonoros que se empreguen deberán ser orixinais, estar libres de dereitos ou ter licenza de uso para o fin educativo que se persegue.





As curtas realizaranse coa participación activa do alumnado en todas as fases de elaboración. Este proceso documentarase cun *making off* final ou un ficheiro anexo con fotografías ou calquera outra documentación que evidencie a intervención do alumnado ao longo do proceso.

As gravacións terán calidade DVD e unha duración máxima de 5 minutos (incluídos os títulos de crédito). O *making off* non computará no tempo establecido.

As curtametraxes tamén incluírán, a modo de información, un espazo de créditos no que recollerán o nome das persoas que participaron na creación da obra (alumnado e profesorado). Engadirán, así mesmo, o logo dos equipos de dinamización da lingua galega e mais unha lenda que indique que a curtametraxe de animación en galego foi elaborada ao abeiro do programa de dinamización lingüística *Nós tamén creamos!* con fins educativos. Esta lenda deberá manterse na difusión posterior da curtametraxe ou na presentación a outros certames.

Todos os dereitos de autor de carácter patrimonial derivados da reelaboración da curtametraxe corresponderanlles á Consellería de Cultura e Turismo e á Consellería de Educación, Universidade e Formación Profesional.

Artigo 7. *Envío das curtametraxes*

Cada curta deberá presentarse gravada nun DVD ou nunha memoria USB, nun sobre no que tamén se deberá incluír un documento cos seguintes datos:

Nome da curta

Categoría pola que se presenta

Centro educativo que a presenta:

 Código do centro

 Nome do centro

 Enderezo

 Teléfono

 Enderezo electrónico

Nivel educativo do alumnado participante

Certificación da dirección do centro coa listaxe do profesorado participante na curtametraxe:

 Nome e apelidos

 DNI con letra

 Relación co alumnado (p. e. titor/a, profesor/a de Educación Física, membro do equipo de dinamización da lingua galega...)





Este sobre dirixirase ao seguinte enderezo:

Secretaría Xeral de Política Lingüística
Rúa San Roque, 2, 1.º andar
15781 Santiago de Compostela

No remite indicárase o título do libro, o da curtametraxe e a categoría pola que participa (véxase o artigo 2).

A medida que se vaian entregando, as curtas poderán verse na sección *Nós tamén creamos!* do web infantil da CRTVG: <http://www.crtvg.es/infantil>.

Artigo 8. *Prazo de entrega das curtametraxes*

O prazo para enviar as curtas elaboradas no marco do programa *Nós tamén creamos!* rematará o 30 de abril de 2019.

Artigo 9. *Comisión de selección e criterios de valoración*

1. Comisión de selección

Para a selección das curtametraxes crearase unha comisión que estará presidida pola persoa titular da Subdirección Xeral de Planificación e Dinamización Lingüística, ou a persoa en quen delegue, e integrada polos seguintes membros:

- a) A persoa titular da Subdirección Xeral de Ordenación e Innovación Educativa e Formación do Profesorado ou a persoa en quen delegue.
- b) Unha persoa asesora técnica da Secretaría Xeral de Política Lingüística.
- c) O coordinador ou coordinadora central dos equipos de dinamización da lingua galega.
- d) A persoa representante da CRTVG.
- e) Unha persoa representante de OQOeditora.
- f) Un funcionario ou funcionaria da Secretaría Xeral de Política Lingüística, que actuará como secretario ou secretaria, con voz e sen voto.

A comisión poderá dispoñer a constitución dunha subcomisión técnica especializada para colaborar na valoración daqueles proxectos que coide pertinentes, que poderá estar integrada por persoal asesor de Innovación Educativa e de Política Lingüística, persoal da CRTVG e persoal de OQOeditora.





2. Criterios de valoración

Valoraranse os proxectos atendendo aos seguintes criterios:

- a) Calidade lingüística, expresividade e interpretación na curtametraxe
- b) Orixinalidade, creatividade e innovación da curtametraxe
- c) Calidade técnica, estética e artística da curtametraxe

Artigo 10. *Resolución*

Logo de analizar as solicitudes presentadas, a Comisión de Selección emitirá a proposta de resolución dirixida ás persoas titulares da Secretaría Xeral de Política Lingüística e da Dirección Xeral de Educación, Formación Profesional e Innovación Educativa.

A resolución conxunta da Secretaría Xeral e da Dirección Xeral publicarase na páxina *web* da Secretaría Xeral de Política Lingüística (www.lingua.gal) e no Portal Educativo da Consellería de Educación, Universidade e Formación Profesional (<http://www.edu.xunta.gal/portal/>), no prazo máximo de 4 meses contados desde a data de entrega fixada no artigo 8.

De non facelo así, as persoas solicitantes deberán entender desestimada a súa solicitude.

Artigo 11. *Difusión das experiencias e dos materiais elaborados*

Os traballos premiados serán publicados na pestana *Nós tamén creamos!* da sección infantil do *web* da CRTVG (<http://www.crtvg.es/infantil/nos-tamen-creamos/etiqueta/nos-tamen-creamos>) e poderán ser difundidos en diversos programas da cadea. Tamén poderán difundilos a Secretaría Xeral de Política Lingüística e a Dirección Xeral de Educación, Formación Profesional e Innovación Educativa nos seus *webs* ou plataformas dixitais de comunicación, incorporando unha ligazón á sección infantil do *web* da CRTVG.

A presentación a esta convocatoria implicará para os centros premiados a colaboración en todas as accións de difusión que se organicen, así como a cesión dos dereitos de propiedade intelectual de contido patrimonial en favor dos organismos que convocan.

De ser o caso, en todas as accións informativas e divulgativas e nas publicacións que se fagan relacionadas con esta convocatoria ou coas curtametraxes de animación reelaboradas farase constar a colaboración das partes nun lugar destacado e





XUNTA DE GALICIA

CONSELLERÍA DE
CULTURA E TURISMO
Secretaría Xeral de Política Lingüística

Rúa San Roque, 2
15781 Santiago de Compostela
Tfno.: 881 996 324
Fax: 881 996 306
sxpl.planificacion@xunta.gal
www.lingua.gal

galicia

utilizaranse, cando proceda, os logos de cada unha das entidades participantes de acordo coa normativa de identidade corporativa.

Artigo 12. *Protección de datos*

De acordo coa Lei orgánica 15/1999, do 13 de decembro, de protección de datos de carácter persoal, os datos persoais recollidos na tramitación desta disposición cuxo tratamento autoricen as persoas interesadas mediante a presentación das solicitudes serán incluídos nun ficheiro denominado “*Avaliación do sistema educativo*”, que ten como obxecto xestionar este procedemento e informar as persoas interesadas sobre o seu desenvolvemento. O órgano responsable deste ficheiro é a Secretaría Xeral Técnica da Consellería de Cultura e Turismo.

As persoas interesadas poderán exercer os dereitos de acceso, rectificación, cancelación e oposición ante Secretaría Xeral Técnica da Consellería de Cultura e Turismo, mediante o envío dunha comunicación ao seguinte enderezo: Secretaría Xeral Técnica da Consellería de Cultura e Turismo, edificio administrativo de San Caetano, s/n, 15781 Santiago de Compostela ou a través dunha mensaxe electrónica a sxpl.planificacion@xunta.gal.

Santiago de Compostela, 5 de decembro de 2018

O secretario xeral de Política Lingüística

Valentín García Gómez

O director xeral de Educación, Formación Profesional e Innovación Educativa

Manuel Corredoira López

